

Profet Yona Nan Gan

Yona Irun্ত Sinung' Yawe Guman Nida Rutin

¹ Yawe irim nan da Amitai narunggan Yona ibiani, ² “Wauri' wafa gamp tsira' Niniwe* da wani nan babampafan da garam gamp igi, i Dzi tsanga ribarangan nanggan maisan ampi bingan nangan, da Dzi bung' araru.”

³ Da bitsinta' Yona yuri' da ifa sanab rугan fada gamp Tarsis i runta sinung' Yawe. Ibinigi da arangan iru' gamp Dzopa ming'a uruts ringampa da iwa' da madzung mangan nida fada Tarsis. Da irim moni gin da iyabin i runta sinung' Yawe.

⁴ Da bitsinta' Yawe itangin fifing tsira' iwa' uruts wasa', da mpui isu iyamiyam da inang i branga madzung. ⁵ Garam runta i madzung irat da inu' gan anutu umpuran ruga rугan i rima sib. Da ribarangan itatapu nam bunump ararai iru' uruts i nanga madzung puapapan.

Da bitsinta' Yona iru' madzung igi wasa' gan da iging' marampru' mung' raiyi. ⁶ Garam gudzun madzung gan ifawa' da Yona da ini rutin ibiani, “Ama!! U buging' ibinigi? Wauri' da waugin da anutu gam! Mani arangan maran bung' agaib agi da narim agi sib i agi anung' mampan u.”

* **1:2:** gamp tsira' Niniwe — Niniwe igi da rib Asiria gampan tsira', da rib Asiria igi isu rib Israil garam ipiapan.

⁷ Da garam runta i madzung igi ini da ruan, “Agi antung¹a rarub i kupisa wasi garam idzuwaarigi su wain i barabin tsira¹ wa'an da agi ani.” Da ribarangan yantung¹ rarub, da rarub ikupis Yona binganggan wasi. ⁸ Da ribarangan igut i Yona ini bina¹, “Wani da agai! Mabi u su wain i barabin wa'an da agi ani? Da agu nang gumam idzuwai? Da u ba iming¹ anung¹? Da u garam utup idzuwai?”

⁹ Da Yona ini da ribarangan ibiani, “Dzi garam utup Hibru, da dzi pumu¹ Yawe, Anutu mpada gunungun tanginda intap da uruts. ¹⁰ Da dzi runt sinung¹ Arangan.”

Gubu¹ ribarangan ringanta gin da irat nam tsira¹ bingan angu da ini da Yona, “U nang asub tsira¹ bingan angu!” ¹¹ Da fifing da uruts iyamiyaman igi iying¹ ifa i suda tsira¹ bingan. Ibinigi da ribarangan igut i Yona, “Aga nanga bida anung¹ i agu da uruts ani ntungan?”

¹² Da Yona ini bina¹, “Wara¹ i dzi da watapu dzi naru¹ uruts, da uruts bung¹ antung. Dzi sru¹ gin i dzi asubang¹ igi da fifing tsira¹ bingan ani iwa¹ da agam.”

¹³ Da bitsinta¹ ribarangan yintsa¹ rini urun gan i tsari¹a madzung igi fada ringampa da inang itsiri, i fifing da uruts irunt tsira¹ bingan iyus miamun ugu da ingaung¹ i gan fadan. ¹⁴ Ibinigi da ribarangan iyugin da Yawe ini bina¹, “O Yawe! Aga gampun runggang¹ da Agu. Bida garam ani asuban ma'an, da anung¹ rima nam munga¹ da agai i arangan nanggan mampan u. Da anung¹

raruda agai bida U raruda garam yatsa garam bi' gan rai u, i wain, Agu, O Yawe, U rim barabin ani da agai, yatsung' U rugam uwayantam.”

¹⁵ Ida garam runta i madzung ira' i Yona da itapu iru' uruts, da uruts iyamiyam tsira' intung.

¹⁶ Ribarangan itsanga Yawe nampang gan da irat tsira' bingan angu i Arangan, da itsara nam da itaga ruan i nanga nam fain da Yawe.

¹⁷ Da Yawe itangin yafas tsira' mangan iba da intap i Yona. Da Yona iging' yafas wangun wasa' isang' gubu' da idziang iru' da bits.

2

Yona Nan Gan Udagin

¹ Yona impa yafas wangun wasa' da yugin da Yawe, arangan Anutu gan, ² ibiani,

“O Yawe! Dzi wa' da barabin tsira' bingan,
da dzi nu' Agu i U rima dzi sib,
da U ringant i dzi.

Dzi mpa iru' garam mampan gampan,
da dzi rang ibia' da Agu,
da U ringant i dzi nanggung' rangan.

³ U tapu dzi ru' uruts warang'
da mpui ifing' i dzi ru' rungum warang'
bingan.

Uruts ibuarum dzi
da U iyamiyamam tsira' ititam i dzi.

⁴ Dzi buni ga' U tiasa dzi rai i U maranggam,
da bitsinta' dzi bung' atip atsanga Agu Un-
garam Mararam.

⁵ Mpui tsira' igangum dzi
da yintsung' dzi yu fufin da asapang' sib

da ibuafir dzi nting angu.

Da dzi nang i mampan.

Bining' bining' yudzu dzi gudzung' gang' sib.

⁶ Dzi sasatup iru' ifa mamai wain ming'a uruts
warang' bingan,

da intap igi itsungin dzi sib i dzi gang' tipa
yaban.

Da bitsinta' Yawe, dzi Anutu gang' Agu;

U tip iyu dzi sinung' garam mampan gampan
da dzi rung' impa marata'.

⁷ Gubu' dzi nanga i mampan

da dzi marang' ifur Agu, Yawe,

da dzi nan gang' udagin ibiawa' da Agu
iming' U Ungaram Mararam.

⁸ Rib pumu'a mugus maraganun mamida i nanga
nam wa'an

irim barun da U maraampi gam.

⁹ Da bitsinta' dzi bung' arim nam tsaradan nabia'
da Agu

ruta mint tsarifa U binganggam.

Da dzi bung' anang nam santan dzi tagada ruang'
gin sib.

I nam rima sib iba iming' Agu Yawe gin
angu.”

¹⁰ Da Yawe ini da yafas itsup Yona iwa' ifa uruts
ringan.

3

Yona Ifa Gamp Niniwe

¹ Yawe itip ini da Yona ibiani, ² “Wauri' da wafa gamp tsira' Niniwe da wafis i sising' dzi riman da agu ugu da garam gamp igi.”

³ Ibinigi da Yona iringant i Yawe nan gan da yuri' ifa gamp Niniwe. Da gamp igi tsira' bingan, da sanab yunga atang'a wasa' i fawa'a gamp igi munga' gan iyu gubu' iru' da bits. ⁴ Yona iyung gubu' mangan sib iming' gamp igi da iyai' ni-fun tsira' bingan ini ibiani, “Agam waringantin! Gubu' 40 angu rung' iming' i Anutu siata gamp ani rai!”

⁵ Garam gamp Niniwe imuaruts Anutu nan gan igi da ipa' ruan i nam gadan. Da ampan santan — ming'a garam gudzun tsira' da bawa'a mama' uta' uta' — yatsuf ngarukui gampunda ruan.

⁶ Da gubu' Niniwe king gan ringanta gin, da arangan yuri' sinung' bintipan, igru' ngarukui king gan da yatsuf ngarukui gampunda ruan. Da arangan impa iru' pap wasa'. ⁷ Da king irim nan babampafan ifan da rib santan Niniwe ibiani:

“Nani nan faidagin iba iming' king da garam gudzun gan gin:

Manga anung' gada nam mangan u — garam gar ma apu pakra ma makau ma dumpa bits anung' gada nam ma numa mpui u.

⁸ Agam santan watsuf ngarukui gampunda ruan, da wabuafir makau da dumpa gin nabinigi. Watangin asub agam nangan da rib fain da sanab maisan mara maran sib angu rai. Da wagaib runggam da Anutu da wau gin babampafan ruta wangunggam santan.

⁹ Manga sru' gin? Mani Anutu maran bung'

antu' agi da naitam i uwayantan, da natangin wangun tsakiadan rai i anung' tiasa agi rai u.”

¹⁰ Gubu' Anutu tsanganda rib Niniwe parima i ruan da tanginda nanggan maisan rai, da Arangan yitam i uwayantan da anung' ingaung' ribarangan ibi nan Arangan nidan ugu u.

4

Yawe Nanggan Maran Ntu'an Inang Yona Nugun Itsakia

¹ Da bitsinta' Yona nugun anung' inuf i Yawe nanggan maran ntu'a rib Niniwe u, da arangan nugun itsakia nidzun angu gin. ² Ibinigi da arangan yugin da Yawe ibiani, “O Yawe! Gubu' dzi rung' mpada gamp ugu da dzi sru' gin sib ibi U bung' anang nam bida nig. Ibinigi da dzi runt sinung' Agu i fada gamp Tarsis. I dzi sru' gin i Agu Anutu maraampi da maran gaiban. U anung' inang da isanting' nugu sasusam sung u, da maran aridan wain Agu. Da U nang da U parim i uwayantam i anung' wayada garam u. ³ Ibinigi da wais dzi funub, O Yawe, i dzi bugin i rung' mpada marata'. Ngarubini bingan i dzi mampan.”

⁴ Da Yawe ini arangan nan gan munga' ibiani, “U yu wangum iya!? Nigi madaum?”

⁵ Da Yona iwa' mana' sinung' gamp tsira' igi da ifa mpa iming' gubu' yaban. Da ming'an nig da arangan itip marayawa' mangan da impa yaung gin. Da impa ifang' i tsanganda nam idzuwai bung' awa' i gamp tsira' igi. ⁶ Da Anutu Yawe itangin bru' mangan da intap iyab da irim yaung

i Yona gudzunggan i rima arangan sib. Da Yona nugun inufin. ⁷ Da pisa maratait da Anutu itangin apu uruai mangan da igara bru' da imayang' gin. ⁸ Gubu' impa wasa' da Anutu irim manis sasusan iming' gubu' yaban iba. Gubu' tsira' itai Yona gudzun, da maran ididirunt da inang i mampa asub. Da arangan ini biani, “Ngarubini bingan angu i dzi mampan. Dzi bugin i rung' mpada marata!”

⁹ Da Anutu ini da Yona ibiani, “Nigi madaum i u uda wangum i bru' maring'an igi?”

Da Yona ini bina', “Hai, idaum! Dzi gurungur iyus da dzi ni mampan!”

¹⁰ Da Yawe ini da arangan, “Bru' ani runggan iyab da idziang mangan, da imaring' da idziang mangan. Da u anung' isu gum asap asap in ma irim sib i rung' dzufan u. Da u maram intu' i nam isi' arigi. ¹¹ Da bitsinta' gamp Niniwe gamp tsira' bingan da rib mpadan nigi iyus 120 tausen, impru' da apu pakra ampi bingan. Rib igi anung' isru' i nam bini da maisan u. Da nam idzuwai bumais i dzi marang' ntu'a gamp tsira' igi?”

Adzera Baibel
Portions of the Holy Bible in the Adzera Language of
Papua New Guinea
Hap Buk baibel long tokples Adzera long Niugini

copyright © 2009-2022 Wycliffe Bible Translators, Inc.

Language: Adzera

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-05-20

PDF generated using Haiola and XeLaTeX on 21 May 2024 from source files dated 20 May 2024

1546e90c-83f8-52de-99ec-bcac4c0552a1